


釋氏十
三經註
疏

楞嚴經纂註

卷五
之六

五十冊



大佛頂如來密因修證了義諸菩薩萬行首楞嚴經
纂註卷第五

唐天竺沙門般刺密諦譯

唐烏菴國沙門彌伽釋迦譯語

唐菩薩戒弟子前正議大夫同中書門下平

章事清河房融筆受

明樞李沙門眞界纂註

阿難見性猶未造修如獲華屋未能深入故請修

行要門以求證入由是前文先明止觀二決定義

略示修斷要門矣此下廣明解結以至二十五聖

各陳圓通。敕選耳根爲初心方便。則廣示止觀修斷要門。令其一門深入。無出二決定義。是以下云。知見無見。斯卽涅槃。於法不取。名三摩提。又云。若欲除結。當於結心。至觀音陳圓通云。入流亡所。寂滅現前。文殊開示云。旋倒聞機。反聞自性。性成無上。皆依止觀逆彼業流。循順圓通。而圓成果地也。故知廣明解結。及諸聖所陳。文殊所示。無出二決定義。但廣略開示之殊耳。

阿難白佛言。世尊。如來雖說第二義門。今觀世間解結之人。若不知其所結之元。我信是人終不能解。世

尊我及會中有學聲聞亦復如是從無始際與諸無
明俱滅俱生雖得如是多聞善根名爲出家猶隔日
瘡惟願大慈哀愍淪溺今日身心云何是結從何名
解亦令未來苦難眾生得免輪迴不落三有作是語
已普及大眾五體投地雨淚翹誠佇佛如來無上開
示。

此躡前文而請示結解之元也蓋六根所結之元
卽微細流逸之念此念卽俱生無始無明以六根
流逸奔塵則由念而輪迴生死不流則離念而速
證妙常故知結解皆由念也以念不亡則病根未

盡。故喻如隔日瘡。由是而知前令脫粘內伏。乃伏
思惑狂機。此問結解之元意。在窮盡微細無明也。
爾時世尊憐愍阿難。及諸會中諸有學者。亦爲未來
一切眾生。爲出世因。作將來眼。以閻浮檀紫金光手
摩阿難頂。卽時十方普佛世界。六種震動。微塵如來
住世界者。各有寶光。從其頂出。其光同時於彼世界
來祇陀林灌如來頂。是諸大眾得未曾有。於是阿難
及諸大眾。俱聞十方微塵如來異口同音告阿難言。
善哉阿難。汝欲識知俱生無明。使汝輪轉生死結根。
惟汝六根更無他物。汝復欲知無上菩提。令汝速證。

安樂解脫寂靜妙常亦汝六根更非他物。

此示結解之元也。先摩其頂。表無上開示。六種震動。表破六根妄結。諸佛頂光灌釋迦頂者。示同發明。無上頂法也。異口同告者。示諸佛脫生死證菩提。皆由斯要也。俱生卽根本無明。生死妙常同因。六根者。知見立知。故輪生死。知見無見。卽證妙常。如下所明。

阿難雖聞如是法音。心猶未明。稽首白佛云。何令我生死輪迴。安樂妙常。同是六根。更非他物。佛告阿難。根塵同源。縛脫無二。識性虛妄。猶如空華。

此因重問結解之元。故先告本無生死涅槃之體
也。蓋根塵同源。識亦同源。識性虛妄。根塵亦妄。文
互略也。縛脫無二者。謂迷之縛於根塵。故輪生死。
悟之脫於根塵。故證妙常。縛脫雖殊。性無有異。故
云無二。然則生死妙常。皆由六根。既云同源無二。
則本無根塵縛脫之相。何有生死妙常。故下偈云。
眞性有爲空。無爲無起滅也。

阿難。由塵發知。因根有相。相見無性。同於交蘆。是故
汝今知見立知。卽無明本。知見無見。斯卽涅槃。無漏
眞淨。云何是中更容他物。

此示結解之要。以釋其疑也。謂根塵由相藉而有。如交蘆因相依而立。俱無自性。然於其中。不了虛妄。隨逐六根。分別六塵。斯卽無明本。所謂迷晦卽無明也。若達相見無性。不隨六根分別六塵。斯卽涅槃真淨。所謂發明便解脫也。云何是中更容他物者。由上諸佛告阿難言。輪生死證妙常。惟汝六根更非他物。阿難於此有疑。重舉問佛。故佛先明本無生死涅槃之體。至此告以知見立知等者。蓋知見二字。通攝六根。言爲無明爲涅槃。無非六根而已。豈更容他物哉。此蓋釋阿難之疑。而證諸佛

之言也。又阿難前云。若不知其所結之元。我信是人終不能解。又云。今日身心云何是結。從何名解。故如來答以知見立知。卽是結也。卽是所結之元也。知見無見。卽名解也。

爾時世尊欲重宣此義而說偈言。眞性有爲空。緣生故如幻。無爲無起滅。不實如空華。言妄顯諸眞。妄眞同二妄。

此頌根塵同源縛脫無二也。蓋同源無二。明眞性中無根塵縛脫之相。故此頌有爲無爲皆虛妄也。以有爲無爲卽縛脫相故。言有爲者。由迷本性縛

於根塵。故曰有爲。性中本無是相。故云空也。此則眞性是有法。有爲空。故爲宗。因云緣生故。同喻如幻。言無爲者。由悟本性。脫於根塵。故曰無爲。性中亦無是相。故云不實。此則眞性是有法。無爲不實。故爲宗。因云無起滅故。同喻如空華。此第二量中。先因後宗。譯人語便。亦無所失。既有爲無爲皆妄。則對妄之眞亦妄。故云言妄顯諸眞。妄眞同二妄也。此出掌珍論。岳師不以有爲無爲皆妄而解。非經論意。故此取長水之解釋之。

猶非眞非眞。云何見所見。中間無實性。是故若交蘆。

此頌相見無性同於交蘆也。猶非真非真一句。承上起下。謂真與非真。尙不可得。云何更有妄中根境乎。中間下。謂根境由相藉而有。中無實性。故喻如交蘆也。

結解同所因。聖凡無二路。汝觀交中性。空有二俱非。迷晦卽無明。發明便解脫。

此頌生死妙常同是六根。更非他物也。所因卽六根。結卽是凡解。卽同聖。故無二路。汝觀下重牒前喻。令審觀也。言空則相依似有。謂有則不依本空。以例根境相依似有。不依本無也。若不了虛妄。隨

塵分別。卽是無明。故云迷晦卽無明。若達無性。不
隨分別。卽便解脫。故曰發明便解脫。此卽頌知見
自立。知及知見。無見也。
解結因次第。六解一亦亡。根選擇圓通。入流成正覺。
躡前結解之義。起後圓通之文也。六解則根拔。一
亡則性空。言入流者。謂決之而出。流逸奔境。逆之
而入。返流全一。蓋謂選擇圓根。依之發觀。而逆彼
業流。則成正覺也。自此已下。皆孤起頌。
陀那微細識。習氣成瀑流。眞非眞恐迷。我常不開演。
頌根結初起之由也。陀那。此翻執持。謂執持種子。

發起現行。卽第八黎耶。含藏種子爲習氣。發生諸法爲瀑流。湛由是分。結由是起也。此識依眞如合生滅。雜乎眞妄之間。故曰眞非眞也。若以爲眞恐迷妄習而自誤。以爲非眞恐迷自性而外求。故權小教中皆不開演也。深密經曰。阿陀那識甚微細。一切種子成瀑流。我於凡愚不開演。恐彼分別執爲我。外道所執神我。卽此識也。

自心取自心。非幻成幻法。不取無非幻。非幻尙不生。幻法云何立。

頌解結入圓之要也。一切諸法。惟心所現。元無自

性因不了。故而於中取著。妄成根結。是自心取自心。非幻成幻法。由妄取故。有幻非幻。能以觀慧了法如幻。而不妄取。非幻亦無。非幻尙無。幻法何有。幻法不立。則根塵頓淨。圓通現前矣。慈惠忍讓會是名妙蓮華。金剛王寶覺。如幻三摩提。彈指超無學。此阿毗達摩。十方薄伽梵。一路涅槃門。寶回離合堂結頌上文也。由上觀法如幻。不妄取著。故得真妄兩忘。染淨不滯。名妙蓮華。根境結惑。當下消亡。名金剛王覺。卽照而寂。能所兩忘。名如幻正受。依此進修。一彈指間。可超無學。而入圓通也。阿毗達摩。

云無比法。十方如來。迴出生死。速證寂常。莫不由斯。故曰。十方薄伽梵。一路涅槃門。薄伽尊號。具六義。謂自在。熾盛。端嚴。名稱。吉祥。尊貴。

於是阿難及諸大眾。聞佛如來無上慈誨。祇夜伽陀。雜糅精瑩。妙理清徹。心目開明。歎未曾有。阿難合掌。頂禮白佛。我今聞佛無遮大悲。性淨妙常。真實法句。心猶未達。六解一亡。舒結倫次。惟垂大慈。再愍斯會。及與將來。施以法音。洗滌沈垢。

讚謝前法。復請後說也。祇夜云應頌。又云重頌。頌上長行也。伽陀云諷誦亦略云偈。不因長行。但諷

美而頌之。二偈並頌而雙美。故云雜糅精瑩。此指能詮也。妙理清徹。此謂所詮也。無遮大悲。言其博濟也。性淨妙常。眞實法句。卽眞妄兩忘稱性之談。心猶下請後說也。由前偈云解結因次第。六解一亦亡。故此疑之。沈垢微細結惑也。

卽時如來於師子座。整涅槃僧。斂僧伽黎。攬七寶几。引手於几。取劫波羅天所奉華巾。於大眾前。綰成一結。示阿難言。此名何等。阿難大眾俱白佛言。此名爲結。於是如來綰疊華巾。又成一結。重問阿難。此名何等。阿難大眾又白佛言。此亦名結。如是倫次。綰疊華